

沅江縣志

沅江縣志

列女志

金之鏗也石之璨也其質堅也松之峭也蘭之芳也其守固也高山之上有泉自清古井之波因風不起巾幗有丈夫鬚眉或亦難哉昔劉子政漢世名儒而於南子識車聲事亦艷傳之與懷清漸臺之古媛並列他如叅軍新婦貽笑古今天壤王郎何名閨閣而晉書皆班之列女稽顙至斯奚云載筆耶故茲志所輯尤以節烈爲重而年躋台背鄉里稱賢者亦宜揄揚以壽民旣附他志故壽婦特著於此焉志列女

沅江縣志

卷二十六 列女

一

節婦

明

王氏賈賢妻婚八月賢溺死氏年十八遺腹生一子父欲奪其志氏誓不再嫁紡績奉姑上憲賜匾曰獨鶴霜天

蕭氏舒泰妻年十七泰省試死於途氏甘貧紡績奉姑四十餘年鄉里悉嘉其節

王氏曾義妻年十九義死撫遺腹子貧苦百端事聞旌其門

段氏樊斗妻年二十七斗喪遺腹生子東曉甘貧供
課成立爲弟子員後子媳繼亡氏撫幼孫清苦益
勵

賈女周玉妻年十八玉喪貧苦誓不再嫁鄉人欲爲
請旌賈女曰守貞不字婦道宜然非以爲名也力
辭之後以壽終

劉氏郭紹傳妻年十七傳喪遺子珩未週歲父母屢
勸改嫁誓死不從甘貧守志不苟言不色服若有
終身喪者孝事翁姑治家嚴肅雖三尺童子非呼
不敢入擇師訓子後珩入泮仍遵母訓而氏之賢
聲益著邑侯王贈匾曰冰潔可風兩學師唐幸贈
匾曰節貞孝純

國朝

楊氏邑廩生吳才崙妻年二十八才崙歿姑彭氏素
多病氏撫子守節孝事老姑衣不解帶未一載夫
弟才崙相繼卒其妻宋氏亦矢志不二楊與宋兩
孀相依一家內外無間言茹苦教讀撫子姪成諸
生乾隆十八年

旌表建坊三十六年以孫俊升官 賜封太安人卒年
八十六歲

宋氏吳才崧妻年二十五夫歿長子啓鼎甫二歲次子啓秘遺腹生氏矢志守節侍姑彭氏孝養無違姑歿值歲荒家無力僕氏竭力殯葬負土封塋教子啓鼎成諸生苦節三十年卒見湖廣通志

李氏祝如琬妻年二十夫故遺三子氏矢志撫孤歷盡艱辛教課有方季子鳳卜得成弟子員初其夫死臨葬暴雨氏哭泣之極呼天搶地其雨卽止乾隆三十五年

旌表建坊

郭氏生員秦秉煥妻年二十夫歿遺腹生一子名玉

沅江縣志

卷二十六 節婦

三

潤聰穎過人稍有寒暑之災氏輒日夜調持飲食不甘而於翁姑養膳必躬必親不以委諸妯娌潤亦曲體母心力學游泮孫曾多列宮牆氏皆及見之乾隆四十三年

旌表建坊

劉氏生員曹芝蘂妻年二十四夫歿生三子成煥成謨成炳煥甫五歲炳尚懷抱謨早逝氏日親井臼勤紡績二子稍長聘師督學煥與炳俱成諸生長孫士煌亦列庠序氏眼觀五代年至八十四歲卒乾隆五十八年

旌表建坊

鍾氏邑庠生楊世利妻年二十八夫歿命子尚璜業儒尚載服田尚珪尚琢猶幼氏皆教之以義勤紡績操井臼以奉老姑尚璜年十九歿遂命尚載棄農就學得補弟子員縣令韓聞氏苦節贈以聯曰鐵幹回春暖冰心傲歲寒初尚璜死妻李氏年十八遺一子亦矢志靡他後生一孫未及一月子與孫俱亡氏日夜號泣因撫尚珪之子其駙以繼夫嗣兩代冰霜鄉里咸欽鍾年七十有一李年六十有一而卒嘉慶四年俱奉

沅江縣志

卷二十六 節婦

四

旌表建坊

楊金琳妻張氏二十歲適琳琳善讀因病棄業康熙癸巳買舟洞庭欲以山水爲養疴計病發返棹未及抵家而歿張氏年二十七生子四日相携望洞庭哭之明年中子殤乾隆丙辰長子故閱六年次子故已而翁姑相繼歿尤痛不欲生撫幼子成立卒年五十六歲

邑庠生楊金械妻劉氏十八適金械金械卽金琳胞弟讀書成勞疾旋卒時劉年二十七生子纔四月誓志撫孤孤甫成人而天撫同宗子爲嗣與嫂氏

甘心荼蓼後張十年卒年六十歲

楊金琳長于楊梓妻王氏年十六歸梓二十八梓卒生子方滿月氏上奉孀姑下育嬰兒貧無力僕身操井臼艱難萬狀不忍見聞張姑病歿氏哀痛迫切既葬日携數歲兒哭拜墓前行人無不淚落卒年七十二歲

楊金琳季子楊彬妻鄒氏十四歲歸彬彬出繼伯父金蘭乾隆六年彬卒時鄒年二十五無子惟一女父母欲其再醮鄒聞之引刀削其髮姑奪其刀復嚼舌出血誓曰所不爲楊氏婦終其身者有如此

沅江縣志

卷二十六 婦

五

舌堅貞之志卒不可奪所繼之姑歿經營喪葬盡哀盡禮卒年五十六歲一門四節過者酸鼻

廩生羅銑妻楊氏拔貢楊有恥之姊二十八夫故遺一子清尚在齠齡氏矢志守節事舅姑撫孤子朝夕不懈子方成立而亡惟餘二孫相依爲命奈孫亦早逝悽愴無比卒年八十六歲

羅清妻楊氏庠生楊策之孫女年十六于歸生二子長子松次子柏二十一夫故後二子亦相繼亡孀居愴惻卒年六十五歲

羅松妻楊氏年二十八夫故上有兩代孀姑下無應

門穉子氏矢志靡他撫姪炎以繼夫嗣貧窶莫支
辛苦萬狀卒年五十八歲

羅柏妻彭氏三歲歸羅撫養及長婚配生三子長子
炎出繼長房二與三尚幼二十九夫故見祖姑阿
姑兄嫂皆青春守志氏亦封髮自矢忍泣撫孤三
代孤孀一門四節冰霜共凜閭里咸欽卒年五十
一歲

庠生吳大滋妻秦氏年二十八夫故遺一子文純尚
幼氏矢志自守親操井臼克成家業遇族鄰貧乏
者不時周卹鄉人德之卒年七十六歲

沅江縣志

卷二十六 節婦

六

庠生陳宗蕃妻劉氏年二十七宗蕃故生二子長子
纔三齡次子遺腹生翁姑在堂氏矢志守節家徒
壁立夫故之明年姑棄世翁貢生陳經出外授徒
後銓常寧縣訓導卒於任扶櫬歸里氏跪道慟哭
經營喪葬哀感路人長子籌得補弟子員卒年六
十六歲

陳宗敬妻聶氏年二十六夫故生子二長子四齡次
纔週歲氏與嫂劉氏同心茹苦撐持門戶後得眼
觀四代卒年八十一歲

庠生陳簫妻張氏年二十八夫故生子纔數月夫四

弟長子士翔甫生氏並乳撫之及長讀書婚娶之
貲與己子無異士翔游泮食餼氏亦與有力焉氏
即劉氏聶氏之姪媳一門三寡貞操並著卒年七
十一歲

羅霖鐸復姓傅妻王氏年二十夫故生一子亦年二
十子媳偕亡僅遺一孫氏先撫子後撫孫甘貧苦
節卒年九十三歲

陳

廩生
懋昭

妻高氏年二十六夫故一子纔五歲一女遺
腹生翁姑俱在氏矢志守節撫孤成立女長適廩
生秦昌年未幾夫故亦青年守節足徵母教有素

沅江縣志

卷二十六 節婦

七

氏卒年九十二歲

鄧繡妻雷氏頗解詩書年二十六夫故僅二女無子
夫病革謂氏曰我死汝可改適毋悞汝氏號痛欲
以身殉既而曰古有柏舟自誓者此豈有子乎遂
撫二女矢志靡他平居足不踰閭不膏沐不苟言
笑卒年九十歲

張麟妻王氏年二十二夫故僅遺一子氏甘貧守節
閨房嚴肅卽族人難得見面卒年九十歲

楊成橋妻王氏年二十九夫故遺一子先氏而卒苦
志撫孫卒年八十七歲邑令沙贈額曰節壽雙輝

汪友芝妻譙氏歲貢生譙衿次女年二十七夫故撫遺孤二次子早卒踰年長媳亡遺孫一子因家貧難再娶氏食蓼茹荼拾薪自爨撫孫成立生曾孫二人卒年八十六歲

傅煥若妻王氏年二十六夫故遣一子甫四歲氏上事舅姑下撫弱子內操家務外持門戶勤儉自尚禮法克循卒之日□者盈庭卒年八十六歲

邊林侯妻郭氏年二十五夫故子二氏苦守孝翁姑孫振文載孝□類曾孫禮聘入泮氏卒年八十六高立□妻李氏年二十七夫故遺一子辛苦撫孤奉

養翁姑竭情盡慎卒年八十六歲

皮□玉妻高氏邑廩生高名泰之女年十六于歸十八夫故遺子尚乳哺家貧矢志事翁姑克盡婦道乾隆二十六年邑侯韓贈額曰操比松筠學師劉贈額曰柏舟砥節卒年八十六歲

吳萬涵妻王氏年二十七夫故無子撫姪承祧勤苦終身守節五十八載卒年八十五歲

舉人皮現妻劉氏年二十九夫故一子宗倫甫成童翁姑在堂氏勤課兒書婉娛親志姑年六十三翁壽九十六生養死葬孤身獨任子能成名獲膺歲

薦光前裕後一門共賴卒年八十五歲

王者廷妻汪氏年二十四夫故一子甫三歲青年矢志撫孤成立奉養翁姑翁壽八十八歲姑壽七十八歲生葬盡禮人稱孝婦晚年齒落更生行不扶杖目能夜績人以爲罕見卒年八十五歲

李日英妻楊氏年十九夫故一子爲嵩辛勤撫育及長娶媳劉氏亦年二十六而寡遺三子上承姑志同心茹苦後長子之澤名列邑庠二三皆充家姑媳苦節之報也楊年六十有一劉年八十有三而卒

沅江縣志

卷二十六 節婦

九

聶廷芳妻陳氏年二十九夫故生二子長早喪次尚幼氏艱難撫孤紡績自給卒年八十三歲

謝元惠妻楊氏年二十二夫故生二子長再珍三歲次再璽甫歲餘氏甘貧守節上奉孀姑下撫幼子晝操井臼夜勤紡績子再珍事母至孝氏孫六珍子長世培次世坊四世坦皆邑庠生嘉慶戊午氏年八十學使范贈匾曰荻畫松齡聯曰璞玉含貞堅金發采慈雲垂靄愛日留春卒年八十二歲

李爲峻妻王氏年二十九夫故氏奉翁撫孤紡績自給孀居五十三年卒年八十二歲

曹廷選妻熊氏年十五適曹十九夫故生遺腹子氏
矢志撫孤舅姑在堂代夫終養撐支家務有條有
理卒年八十一歲

秦秉愷妻熊氏年十四于歸二十七夫故氏撫七月
嬰孩事六旬舅姑家計艱難守志彌篤卒年八十
一歲

李榮耀妻歐陽氏年二十八夫故生子昌遠方一歲
夫故僅存旱地十餘畝氏采藿勤績以供衣食子
讀書未就督課諸孫長孫運鴻得入泮學使姚聞
其節贈額曰柏貞萱茂衡山太史曠岫嶺有贊卒

沅江縣志

卷二十六 節婦

十

年八十一歲

譙家修妻李氏年十六于歸二十夫故夫病篤時氏
於床前泣誓願代夫事舅撫孤家雖貧之死靡他
卒年八十一歲

譙家語妻張氏年二十八夫故氏抱孤雛侍衰姑誓
不再適借針黹以給衣食卒年八十歲譙氏先人
八世同居孝義之風習聞有素故譙門之以節著
者其清操猶令人起敬云

劉茂榜妻龍氏年二十七而寡三子皆幼氏艱難撫
孤身操井臼翁姑俱年邁朝夕服事毫無倦容卒

年七十七歲

增生皮宗信妻祝氏年二十七夫故一子甫七齡艱難撫育勤儉持家舉孫五讀書未卒業曾孫名廸獲補弟子員卒年七十五歲

李日義妻王氏年二十八夫故遺一子纔四歲氏矢志撫育孝事翁姑紡績以佐家食卒年七十五歲鄧元休妻金氏二十二歲而寡生二子尚乳哺悲痛欲絕姑諭以撫孤大義乃誓任艱劇家窘針紉自給青年居孀白首無玷卒年七十四歲

李成柯妻高氏年十九于歸二十二夫故遺腹生一子氏矢志守節孝事翁姑紡績維勤卒年七十三歲

沅江縣志

卷二十六 節婦

十一

唐爲書妻黃氏年二十一夫故一子甫三月撫孤成立娶媳彭氏年二十四生子僅三月而彭氏亦寡姑媳孀居氏撫孫持家守節六十年卒年八十一歲彭氏守節四十九年現存七十四歲庠生秦秉信妻金氏年二十夫故遺孤甫三月青年矢志勤女紅以資衣食卒年七十三歲何凱旋妻蕭氏年二十六夫故遺一子甫五歲矢志守節翁恐其年少語氏胞兄諭意改適氏聞言泣

涕以死自誓性勤謹事翁與繼姑袁氏以孝稱卒年七十二歲孫三人長朝輔國學生曾孫賁垣郡庠生

李竹坡妻謝氏拔貢李大瓚嗣母也年十九竹坡歿誓志守節或憐其年少無子勸其改適輒涕泣曰我雖無子嗣子獨不可承祧乎遂撫子教讀成名卒年七十二歲

李大柯妻劉氏年二十四夫故一子年甫冠物故氏痛夫歿子死幾不欲生族戚委曲寬慰之以姪學萱繼焉卒年七十二歲

沅江縣志

卷二十六 節婦

十二

職員劉添妻王氏年十八適劉生子宗益甫週歲添故氏年三十歲誓志撫孤及長娶媳吳氏未幾宗益亦故遺腹生一子姑媳相依卒年七十一歲李在忠妻呂氏二十九夫故遺一子氏守節撫孤卒年七十歲

宋開源妻劉氏二十六夫故生一子未週月氏矢志乳撫勤苦儉約處之恬然卒年六十九歲

王晃妻唐氏二十八夫故遺一子艱難砥節撫孤成立卒年六十九歲

李天池妻羅氏年二十六夫故生二子氏撫孤成立

課耕課讀次子文臻援例入太學氏卒年六十八歲

王本甸妻陳氏年二十二夫故無子氏甘貧矢節撫夫三兄之子國宇爲嗣卒年六十八歲

李冀福妻呂氏年二十四夫故一子纔週歲甘貧守志撫孤成立卒年六十七歲

吳啓坤妻李尚珍之次女年十七尚珍招壻入贅氏見翁姑衰邁因搬歸夫家朝夕侍奉翁姑相繼歿與夫共襄大事辛巳歲啓坤故氏年二十八一子方週歲家止瘠田數畝遭六年四水糧無隔宿拮

沅江縣志

卷二十六 節婦

十三

据度日父母勸其改嫁卽嚼舌自誓終能教子成立得見孫枝卒年六十有七歲

職員湯尚志前妻故遺二子續娶蕭氏年二十一踰歲尚志故雖有身男女未卜哀號不止祖姑與姑婉慰之氏飲泣矢志越四月生子禮銘遂破涕爲歡與祖姑同寢室子稍長延師課讀居雖近市不令染市井習視夫前子如己出里黨咸知其賢後禮銘補邑庠易簣時語之曰我今可告無負於爾

父矣卒年六十六歲

蓉峯聶太史有詩

張如柏妻李氏年二十一夫故生子甫八月氏事姑

撫孤冰操不改卒能振興家業後子煥入太學孫
蛟入邑庠卒年六十六歲

劉大受妻李氏年二十六夫故生二子赤貧苦守姑
病癱臥床二十餘年飲食起居曲盡其誠至今家
稱小康皆氏撐持之力卒年六十五歲

庠生蕭杞妻熊氏年二十六夫故遺一子僅四歲矢
志守節事姑撫孤辛勤艱苦卒年六十四歲

孫永治妻曹氏年二十六夫故遺二子家貧撫孤至
長孫家衡名列郡庠卒年六十四歲

吳世萬妻王氏年二十二夫故遺子甫數月氏欲引

沅江縣志

卷二十六 節婦

十四

決自裁宗人互相勸諭以吳氏累世單傳藐孤一
髮千鈞所係甚大並繼姑劉氏年七十餘氏乃誓
志奉姑終身撫孤成立卒年六十三歲

金學泗妻劉氏年二十八夫故遺一子一女氏矢從
一之志奉舅姑完婚嫁以報良人卒年六十三歲

劉大經妻蕭氏年二十九夫故一子甫十歲氏撐持
門戶食貧礪節孫三人曾孫二人卒年六十二歲

劉氏家譜撰有節孝傳

熊文塘妻皮氏二十六而寡遺二子長五歲次三歲
長子未娶而殤次子年二十四亦亡次媳郭氏年

二十一孫二均幼穉氏強起治家事以慰青年孀
媳之心郭氏感姑苦節亦矢志柏舟相依爲命卒
年六十一歲郭氏悲痛益深清操益力後姑四年
卒

陳人敬妻鄧氏年二十七夫故生二子長五歲次在
抱矢志守節事姑慤懃歷水旱飢荒拾藿自食積
米膳姑卒年六十一歲

生員張其謨妻鄧氏年二十一夫故一子方週歲青
年礪節禮法自閑卒年六十一歲

王本傑妻聶氏年二十本傑入贅無子僅一女甫二

歲夫故旋又翁姑偕亡氏誓不再醮夫家無應繼
之人氏歸無可倚卽依父母守節父母憐之終不
欲奪其志紡績縫紉聊以自給卒年六十歲

周常綱妻李氏二十六夫故遺三子皆幼氏苦節自
守歲歉乏食翁姑相繼歿經營喪葬艱苦倍常卒
年六十歲

曹成印妻王氏年二十六夫故一子尚幼氏矢志撫
孤紡績自給卒年六十歲

彭其華妻徐氏年二十六夫故遺一子姑老家貧氏
積米膳姑撫子自採藜藿充飢苦心竭力操持三

十四年而卒

李家祥妻彭氏年二十八夫故一子方二歲姑在堂
竭力奉養卒年六十一歲

李名昆妻王氏二十四夫故無子撫姪顯佑承祧未
幾顯佑亦故家計維艱氏作苦茹淡弄孫自樂卒
年五十九歲

黃克敬妻蕭氏太學生黃和侯之母二十二夫故家
貧守節撫孤成立事祖翁祖姑及翁姑養生送死
俱如禮制卒年五十九歲

田發苾妻朱氏年二十九夫故艱難撫孤卒年五十
九歲

沅江縣志

卷二十六 節婦

十六

鄧徽妻陳氏年二十于歸二十三夫故生子甫六月
飲泣哺孤姑染病氏虔誠默禱願以身代姑旋愈
人以孝感稱之卒年五十八歲

楊尚德妻譙氏年十六于歸生子甫三月夫故氏痛
不欲生復念孤無所託兼以翁與繼姑在堂生死
咸賴遂忍泣自誓卒能撫子成立迨翁與繼姑棄
世禮無少懈卒年五十八歲

張思忠妻賈氏二十七夫故遺腹生一子矢志守節
上事翁姑下撫孤子卒年五十八歲

廩生秦昌年妻陳氏陳懋昭之女生一子夫故遺腹
生一女氏撫子女成人青年矢志孝養翁姑卒年
五十六歲寧鄉進士王文清有贊次孫鵬郡庠生
陳以升妻藍氏年十八適陳二十八夫故生子一女
二矢志從一紡績自給卒年五十四歲

李立朝妻楊氏年十六適李十八夫故生遺腹子家
瑗氏奉姑撫孤子稍長紡績課讀壬戌氏病危家
瑗左右湯藥者數月氏見子勞瘁強起慰之家道
中衰老姑故竭力葬具卒年五十四歲

李日蕪妻張氏年二十七夫故食貧守節上事翁姑
沅江縣志 卷二十六 節婦 十七
下撫孤子卒年五十三歲

增生汪應明妻張氏年二十九夫故一子僅數歲上
事孀姑下撫孤子卒年五十八歲

危夏書妻湯氏年二十七夫故遺二子長六歲次五
歲氏夫兄弟五人同居各爨氏無恒產惟屋後餘
地半畝日則苦力鋤耨夜則紡績不休聊以自給
二子讀書未卒業後孫光勳名列鬻序卒年四十
五歲

郡庠生張日煥妻祝氏歲貢祝鳳詔次女十八于歸
生三女一子一子二十八夫故氏抱子日夜悲哀繼而

子復天呼天搶地死而甦者再迄夫大事已終潔處一室時撫三女涕泣不絕遂成羸疾茹苦十餘年憂鬱而卒年四十二歲

龍宗溥妻皮氏湘潭縣訓導皮拔元之女年二十四夫故一子未週歲氏祝天祝祖冀其成立旋因夫死子幼憂勞成疾四十二載而卒氏性慈愛樂施舍捐齊湖口義渡田六畝氏既歿其子孔吉痛母不壽一病弗起亦僅遺一子今其媳陳氏瑩瑩子立青年撫孤皆氏所感云

湯傳緒妻夏氏十七于歸十九夫故一子遺腹生氏

沅江縣志

卷二十六 節婦

十八

矢志撫孤卒年四十歲

晏傑妻張氏年十六于歸未一載夫故時有遺腹氏毀容泣血誓以身殉翁姑恐其傷生苦勸稍釋未幾生一男氏方破涕爲歡上事二親下撫孤子守節十五年憂鬱成疾而卒時年三十二歲

張其煒妻趙氏二十六夫故一子名德錦甫歲半氏守節乳哺迨德錦受室後復先卒遺三子媳陳氏亦冰操自矢事姑極孝後姑病危陳氏割股以□病尋愈人謂節母孝婦聚於張門云陳氏事詳孝

石如瑀妻黎氏年二十八夫故生二子貧苦守節誓不再醮與姑同寢處朝夕事奉毫無厭志苦節三十二年

劉仁親妻秦氏年十七于歸二十二夫故遺一子方二歲氏矢志守節撫孤成立見孫六曾孫八卒年七十一歲

艾成章妻秦氏年二十六夫故二子尚幼翁姑在堂家徒壁立辛苦支持至今二子年皆六旬餘孫八曾孫六元孫一五世同堂現年九十二歲

李本魁妻郭氏年二十而寡撫三月孤一華成立教

沅江縣志

卷二十六 節婦

十九

讀婚娶以母兼父至今子列耆英孫曾繞膝氏猶矍鑠現存九十一歲

郡庠生胡學孔妻姚氏年二十九夫故二子幼弱家計蕭條氏冰霜自凜紡績維勤至今衣食粗足現年八十八歲

王世鐸妻許氏年二十八夫故無子欲以身殉旋念翁歿時夫僅三齡姑唐氏以二十七歲守節撫孤遂上體姑意忍泣矢志奈夫鮮兄弟無人可繼姑媳相依數十年後始擇嫡堂弟世銓次子立政承桃姑今八十有五目瞽艱於舉動氏朝夕奉養左

右扶持頃刻不離兩節相承姑賢婦孝人無間言
現年六十三歲

楊永清妻黃氏年十六歸楊二十夫故堂上二老膝
前一孤仰事俯育飲冰茹蘖後子壯受室孫枝林
立現存八十五歲

石有烈妻陳氏年二十八夫故生一子不育朝夕哀
號族戚立其周親有照之次子爲嗣撫養教娶直
如親生勤苦守節至老不倦現年八十四歲

李書兆妻張氏年十九夫故僅一女矢志守節欲撫
子爲夫延宗祀爲翁姑終餘年有欲奪氏志者氏

沅江縣志

卷二十六 節婦

二十

偕胞弟鳴官經邑令余公擇長房姪家鳳爲嗣旌
云撫猶子而承祧操矢柏舟遠強暴以全名芳標
彤管匾其廬曰節凜冰霜元媳張氏早故續娶媳
楊氏亦無子妾媳呂氏生二子尚幼而嗣子年五
十歲卒氏一室三寡悽愴萬狀慟抱兩孫相依爲
命現存八十三歲

劉廷璜妻鄒氏年二十六夫故遺一子甘貧守孤和
丸教讀子金詔入邑庠現年八十二歲

劉錫侯妻李氏二十七夫故生二子長七歲次遺腹
生撫育辛勤至老猶不停績現年八十八歲

庠生汪應星妻皮氏年二十九夫故生二女無子撫叔恩貢生汪應韶子宗仲承祀老姑釋子仰事俯畜茹苦含酸子故遺孫四越數年長孫故遺曾孫一現年八十一歲

陳詠詩妻羅氏年二十六夫故子甫歲餘集蓼茹荼苦承夫志今子宗翰援例授職孫曾林立眼觀四代現年七十八歲

石有華妻傅氏年二十六夫故遺腹生一子撫字辛勤現年七十八歲

曹成鳳妻李氏二十八歲而寡僅一女無子撫姪士璿以繼夫後現年七十七歲

沅江縣志

卷二十六 節婦

二十一

鄧元煦妻吳氏年二十四夫故僅遺一女氏欲以身殉親支俱單傳族衆擇遠房廷桂四子亨巽承祧氏遂銳志自守越數年伯叔偕亡兩姪俱孤僅薄田數畝氏支持三戶家事艱難困苦孀闈罕聞現年七十七歲

周世德妻黃氏年二十七夫故遺三子姑老家貧勤苦節儉現年七十七歲

熊文耀妻羅氏監生羅國榮女年十五適邑庠熊桂之三子文耀年二十耀故生二子尚襁褓次子殤

氏矢志撫孤貧窶自守現年七十六歲

邑庠生黃崇年妻吳氏十九于歸孝事翁姑篝燈紡績佐夫誦讀乾隆癸未崇年入泮逾二載病故一子志漢甫二齡姑與翁相繼逝變故頻仍一綫之存惟氏是賴赤貧苦守居雖近市不欲子稍染市井習黃氏十六世簪纓相望常舉此以勵志漢漢亦善體親心克興家業現就吏選孫可綬曾孫大珏皆就傅讀書母之晚景堪娛矣邑令傅贈額曰吉協安貞現年七十八歲

王大鵬妻祝氏二十一歲而寡無子氏矢志守節撫夫胞兄大鷲之子本棕爲嗣生孫承縞嗣子故氏與嗣媳劉氏兩寡相依撫孫成立命入成均至今曾孫林立現年七十六歲

王本敦妻黃氏年二十六夫故一子方三歲姑年老氏居貧矢志藜藿自甘而事姑則潔饌以進姑年七十九歲終喪葬盡禮氏現年七十六歲

王嘉宇妻田氏二十九夫故遺腹生一子先是氏夫亦遺腹生賴姑李氏守志撫成氏仰承姑志甘貧砥節上事衰姑下育弱息厥後姑年八十三歲終氏盡哀盡禮感及路人現年七十六歲

秦玉紋妻劉氏年二十七夫故無子矢志撫姪承祧
至今一堂四代現存七十四歲

傅習訓妻陳氏年二十五夫故氏撫兩弱子孝事翁
姑後二子相繼亡長媳長孫復相繼亡伶仃孤苦
險阻備嘗現年七十四歲

李忠良妻楊氏年十九夫故遺腹生一子家貧無措
女工營生奉翁姑曲盡婦職後翁病篤將死氏恨
無衣殯殮呼天號泣一日出外汲水拾得新衣一
件坐守久之無人來認因携歸翁死卽以此衣殮
之適合翁體人以爲天憐貧婦遠近傳爲奇事乾
隆二十五年子亦亡僅守一孫伶仃孤苦現年七
十三歲

方同里妻王氏年十五于歸十九夫故遺腹生一子
旣壯受室子媳俱亡氏撫幼弱孫形影相弔現年
七十三歲

楊青晏妻王氏年二十九夫故三子俱在齠齡食貧
茹苦現年七十三歲

宋開賢妻彭氏年二十八夫故遺一子一女氏矢志
撫孤甘貧茹苦現年七十三歲

李光家妻皮氏年十七適李二十一夫故時翁姑在

堂長子方三齡次子遺腹生氏事親撫孤淡泊自
甘辦理翁姑喪葬勤課二子讀耕無歉婦職現存
七十二歲

鄧元長妻劉氏年二十五夫故生遺腹子氏抱嬰孩
守夫志紡績勤勞冰蘖之操人無間言現年七十
二歲

宋華封妻李氏二十五夫故遺二子家貧撫孤後子
壯受室得見孫男七曾孫五現年七十二歲

王倫叙妻高氏年二十二夫故遺二子教讀完娶備
極艱辛現年七十二歲

沅江縣志

卷二十六 節婦

二十四

盛國玉妻王氏年二十五夫故一子僅三月寒燈孤
影紡績自給現年七十二歲

徐上選妻曾氏年十七于歸二十五夫故生子一艱
難撫育至今孫曾繞膝現年七十一歲

謝元虎妻李氏年二十六夫故遺子二長四歲次方
踰月家極貧矢志守節撫孤成立紡績以供伯叔
五人姑歿後獨養病翁七年現年七十一歲

鄧璣妻楊氏年十六于歸十八舉子越月夫故撫孤
礪節備歷酸辛現年七十歲

郡庠生王誦妻廖氏年二十七夫故遺一子一女尚

屬孩提翁姑在堂忍泣矢志後翁壽益高晨夕供膳備極精細節孝之稱咸無間言至今子能成家孫亦繞膝現存七十歲

夏盛先妻蕭氏年二十五夫故二子尚幼家貧苦守翁姑在堂曲承歡心氏夫無伯叔兄弟氏以一身摒擋家務翁姑歿經營大事備歷艱辛見者慘然現年七十歲

曹成謨妻陳氏年二十四夫故無子矢志守節撫姪士偕爲嗣至今孫曾林立現年七十歲

汪宗齡妻劉氏年二十八夫故遺二子孀姑在堂上
沅江縣志 卷二十六 節婦 二十五
盡孝養下撫幼孤年七十歲

賈紹虞妻曾氏年二十八夫故守節撫孤紡績勤勞現年六十九歲

石有造妻楊氏年十四于歸十九夫故青春矢志室無嬰遺家徒壁立撫猶子承祧衰姑在堂生事死葬竭力營辦迄今眼觀四代現存六十九歲

郭訓妻曹氏二十六夫故僅一子年長娶媳生子尚在襁褓子與媳俱亡氏撫七歲孤孫食貧守節得見曾孫現年六十七歲

張世廉妻余氏二十七夫故遺二子長方二歲次僅

週月翁姑在堂俯仰惟氏是賴現年六十六歲
曹廷廸妻張氏年二十四夫故遺一子名紹宗撫孤
成立娶媳劉氏生子名家伸僅月餘紹宗故劉氏
年二十五克承姑志紡績奉養丁巳歲家伸又故
遺三子媳祝氏依祖姑與姑共守清操一門三節
張氏年七十二故劉氏現年七十二歲祝氏現年
五十歲

聶光輝妻高氏年二十七夫故生一子纔九月矢志
守節家貧侍女工以供衣食現年六十五歲

萬國談妻熊氏年二十三夫故事姑撫孤紡績勤勞
沅江縣志 卷二十六 節婦 二十六
現年六十五歲

傅克諧妻吳氏年二十四夫故遺一子家道單寒姑
年邁氏內外經理勤勞自甘現年六十五歲

楊尚儒妻石氏年二十八夫故生子二長五歲次甫
四月氏冰霜自矢事姑盡孝後長子其高援例受
職千總家稍贏施與無吝色人稱賢母現存六十
四歲

祝鳳宸妻陳氏年二十一夫故長子光劍甫二歲次
子光前遺腹生氏矢志撫孤篝燈課讀後光前獲
游泮食餼長子光劍早故遺媳李氏年二十九子

尚幼李氏上承姑志厲節茹苦兩世孀居陳氏卒年五十五歲

廩生皮採元妻秦氏年十六于歸篝燈佐讀午夜不休卒能相夫游泮食餼二十四夫故厲節撫孤嫠居茹苦現年六十三歲

楊上賓妻傅氏年二十四夫故一子甫二歲翁姑在堂氏忍泣撫孤以慰二老後翁姑繼逝經營喪葬操紡績以償借貸媳又早亡惟恃兩孫以終餘年現存六十二歲

沅江縣志
卷二十六 節婦
二十七
楊佐忠妻曹氏年二十九夫故遺二子家甚窘迫撫孤成立現年六十二歲

郭宗邦妻楊氏年二十于歸生一子不育二十六夫故氏矢志守節事翁與繼姑皆竭誠盡慎撫夫弟經邦長子爲嗣現年六十一歲

王邦鎮妻吳氏年二十七夫故二子猶乳哺氏甘心守志上事翁姑下撫弱息逾年次子夭長子方壯又逝姑媳相依撫二孫爲命一門雙節清操共厲現年六十歲

楊尚炳妻張氏年二十夫故生二子甘守苦節閨房嚴肅雖周親至亦不踰闕現年六十歲

邑庠生龍宗元妻鄒氏二十八夫故遺一子矢志守節食貧益礪現年六十歲

譚元勳妻彭氏年二十七夫故一子方五歲氏矢志守節孝養翁姑身操井臼現年六十歲

劉宗顯妻談氏年二十六夫故膝下三孤嗷嗷待哺乾隆戊戌旱荒刈蓬蒿充飢清操不改現年六十歲劉氏家譜撰有節孝傳

劉嶽妻祝氏貢生祝鳳來長女年十七于歸姑病與夫同盡勞瘁嶽以哀毀卒惟遺二女氏年二十一以節自矢撫姪良觀爲嗣教養成人遇翁姑與夫喪祭及生忌盡哀盡禮積數十年如一日誠不失爲孝子婦現年六十四歲

蕭昌杞妻唐氏年二十三夫故一子六歲一女甫三月矢志守節撫子成立翁姑生歿一身經理現年六十歲

高成廸妻胡氏年二十六夫故二子皆在襁褓氏守志撫育今二子成立孫枝盈庭氏猶躬勤紡績不自暇逸以爲居家者訓現年六十歲

陳儲輝妻賈氏年二十九夫故生子二長昌典次昌爵俱幼釋氏摒擋家政竭力經營子稍長延師課

讀畫荻和丸加以母教二子皆名列膠庠嘉慶十年學使吳贈匾曰庸行難能現存六十歲

劉宗益妻吳氏年二十四夫故娠六月氏恐斬夫嗣矢志撫姪越四月生遺腹子大嶽及長教讀婚娶子與姪無異視兩世孀居冰心愈篤現年六十歲
蕭正選妻郭氏生二子夫故氏年二十九歲守節撫孤乾隆戊申垵堤夜潰屋被淹氏抱子呼號忽浮一木至母子依靠兩全人以爲異現年六十一歲
石宗淮妻傅氏二十四夫故遺孤方週歲氏撫育教訓慈不廢嚴事暮姑存歿盡禮現年五十九歲

沅江縣志

卷二十六 節婦

二十九

王學青妻徐氏年二十一夫故一子遺腹生姑亦孀居俯仰惟氏是賴現年五十九歲

國學生吳俊榮妻郭氏年二十八夫故生三子均幼氏操持家政子稍長延師課讀每出必以禮閑之家頗豐盈而終身縞素今長子良譽援例授職州同次良誠良調俱列庠序現年五十八歲

石宗性妻胡氏二十三歲夫故一子尚穉翁姑年衰氏撫遺孤事二老紡績自給現存八十五歲

張爵尊妻劉氏年十九夫故氏誓不欲生以翁衰姑病夫弟復幼於是婦兼子道維持家政一生賢淑

敬謹現年五十八歲

文煥妻胡氏年二十六夫故二子俱在襁褓誓志撫孤現年五十八歲

黃永貞妻陳氏年二十五夫故遺二子長二齡次五月氏含悲乳哺衰姑王氏亦孀居病臥十餘年永貞無兄弟氏以婦代子甘旨醫藥之資隻身營辦辛苦備常姑歿哀禮兼盡人稱孝婦現年五十七歲

李立集妻鍾氏年二十一夫故生遺腹子氏矢志撫孤家事獨力支持奉舅姑始終盡禮後子家撰入

沅江縣志

卷二十六 節婦

三十

成均克承母訓現年五十七歲

胡曰智妻鄭氏年二十四夫故一子夭亡氏矢志守節撫長房次子承訓爲嗣教讀完娶苦力支持現年五十七歲

楊昌明妻舒氏年二十四夫故生子甫數月矢志守節辛勤百倍未幾子死撫夫兄次男開煥承祧現年五十六歲

職員金仁則妻高氏二十九夫故子五人教讀婚娶一身任勞事繼姑尤孝謹長子煜魁就吏選次子煜封入成均餘皆出就外傳現年五十六歲

王本瓊妻曹氏年二十二夫故一子遺腹生矢志撫孤翁姑在堂代夫以終其事現年五十六歲

朱光輝妻姚氏年二十七夫故遺腹一子矢志守節家無薄產苦力支持現年五十六歲

王章傳妻葉氏二十八夫故生三子舅姑在堂仰事俯育衣食之資拮据萬狀現年五十五歲

王成瑤妻蕭氏年十六于歸二十一夫故上事二老下育兩孤茹藥飲水紡績勤勞現年五十五歲

李學浴妻胡氏年二十夫故遺一子鹿鳴妻湯氏年二十五夫故子幼家貧守節敬事孀姑生歿盡禮

沅江縣志

卷二十六 節婦

三十一

現年五十五歲姑胡氏卒年七十人稱雙節

羅之玉妻唐氏二十七夫故甘貧撫孤現年五十五歲

趙應潢妻科氏年十六于歸二十二夫故一子遺腹生隻身拮据苦節自甘現年五十四歲

張光典妻趙氏年十八歸張二十夫故一子尚襁褓氏矢志撫孤紡績自給現存五十四歲

李立綸妻傅氏年二十六而寡三子俱幼老姑在堂仰事俯畜一身獨任現年五十四歲

蕭世英妻秦氏年二十七夫故一子甫三歲立節撫

孤姑老病左右扶持獲保餘年今子澤翼名列太學義方之訓母教猶嚴現年五十四歲

楊逢澹妻傅氏年二十八夫故一子甫歲餘氏不欲生絕粒數日復念子尚乳哺翁姑在堂強起自誓遇歉採藿度日事翁姑克盡婦職現存五十四歲
曹士傑妻李氏邑庠生李光先之女年二十五夫故一子尚襁褓氏冰操自矢艱難撫孤孝養翁姑撐持門戶現存五十四歲

唐志進妻黎氏年十六歸唐甫三載夫故生一子僅歲餘翁姑在堂妯娌分居氏矢志守節善事翁姑雖家計窘迫氏左右經營卒保遺業子克承先緒三孫俱能成立曾孫數人現年七十六歲

金葉妻黃氏卽金劉氏之媳也年二十七夫故生三子俱幼氏居夫喪畢其母誘以異志氏曰姑昔不忍棄吾夫而他適吾今豈忍背吾姑乎遂指天日自誓奉姑終身撫子成人現存五十四歲
陳肇義妻徐氏年二十五夫故遺一子氏守節撫孤撐持門戶現年五十三歲

顏朝聘妻張氏年二十七夫故遺二子堅貞矢節勤儉持家先翁國亮曾於乾隆三十五年捐曾家垵

田二十畝後更買石磯垵田十畝充 文昌廟香

火氏善體翁意周濟貧苦現年五十三歲

夏玉先妻游氏年二十六夫故遺二子賴夫弟監生

璧先教育後璧先逝無嗣氏將次子德裕出繼璧

先現年五十三歲

邑庠生王光大妻郭氏年二十九夫故一子甫七齡

翁姑善病氏侍藥餌飲食未嘗稍懈及翁姑歿殯

葬如禮現年五十三歲

趙啟仁妻高氏二十四夫故遺腹生一子苦節自守

孝養翁姑現存五十三歲

沅江縣志

卷二十六 節婦

三十三

張玉談妻陳氏年十六適張二十夫故一子尚在懷

抱氏飲泣乳哺上奉翁姑孝養無缺現年五十三

歲

李家仁妻黎氏年十九夫故一子遺腹生有以年少

家貧勸氏再醮者卽起避不聽卒能撫孤成立現

年五十一歲

楊青枝妻藍氏年二十一夫故一子甫週歲居貧守

節現年五十一歲

國學生田發茗妻邱氏年三十夫故一子尚幼礪節

撫孤紡績勤勞現年五十一歲

曹紹桓妻王氏年二十八夫故僅遺一子體弱善病
兩孫尚襁褓撫孤茹苦身如集蓼現年五十一歲
李大成妻曾氏年二十六夫故三子俱幼氏矢志撫
孤現年五十歲

邑庠生廖發榮妻李氏李正華女適監生廖鑑之四
子發榮年二十五榮故一子育璋方週歲氏撫育
倍切稍長延師課讀家頗豐猶紡績不輟鄰里窮
乏者賴以分潤人稱賢母現年五十歲

祝光懷妻王氏年十八適孝子祝鳳舞之子光懷懷
因讀書抱病旋故氏年二十八遺二子長甫二歲
次遺腹生舅姑年皆六旬祖姑八旬有三氏奉侍
惟謹後三老棄世至嘉慶丙寅次子亡越六日長
子繼亡氏守孫以待餘年現存五十歲

龍宗洛妻吳氏編修吳俊升長女年十七適李二十
二夫故遺一子方週歲氏青年矢志屏絕鉛膏侍
翁姑以孝教穉子以義姑先翁卒復善事繼姑後
翁歿代夫行孝哀感路人待夫二弟尤爲篤厚與
其子一體延師教讀今子孔彰已列成均猶督責
不懈計苦節二十八年現存五十歲

李立高妻楊氏年十六于歸十八夫故生子甫週歲

氏矢志撫孤翁姑相繼棄世祖翁姑猶存氏以一身承兩代事奉極孝後祖翁姑歿喪祭盡禮現年五十歲

楊林芷妻陳氏年二十六夫故生子僅七月家貧撫孤其祖姑陳氏青年砥節年六十時太史曠敏□贈有節壽匾聯年七十六而卒氏上承祖姑懿訓茹苦含酸歷久不渝現年五十歲

黃發榮妻張氏年二十五夫故一子方週歲矢志撫孤現年五十歲

李日璇妻楊氏國學生楊金槐女年二十五夫故矢志撫孤現年五十歲

沅江縣志

卷二十六 節婦

三十五

志撫孤甘心窮困事翁姑克盡孝道厥後子既成立延師課讀慈不廢嚴現存五十歲

劉大昆妻曹氏年二十八夫故遺二子誓志撫孤長子光衆娶媳袁氏亦年二十而寡無子撫夫弟三子承祧姑媳雙節曹氏歿年五十二歲袁氏現年五十歲

黃發明妻陳氏年二十六夫故無子撫夫弟之子金萬承祧家貧苦守現年四十九歲

熊生勰妻彭氏年二十夫故遺腹生一子氏年少誓志食貧撫孤現年四十九歲

祝鳳祥妻陳氏 旌表祝李氏之次媳年二十夫故
止生一女氏感姑貞節亦誓不再醮撫姪光佑承
祧卒年八十一歲又李氏之姪鳳年妻皮氏年二
十四夫故家貧無子冰霜是凜撫姪光嗣承祧卒
年八十三歲

王榮妻熊氏年十五于歸二十九夫故撫育五子奉
侍翁姑甘貧苦節孫十四章偉國學生章聘邑廩
生曾孫三十四文甲雲青必照漢昇元麟俱庠生
永望汝漣俱職員氏卒年九十六歲

熊如鶴妻陳氏年十九夫故遺一子氏矢志撫孤歷
沅江縣志 卷二十六 節婦 三十六
盡艱辛守節六十九年毫無玷言

饒正田妻李氏年十六于歸二十八夫故遺二子長
三歲次在襁褓氏矢守節撫孤成立卒年七十四
歲

聶綬妻熊氏年二十九夫故生四子二女勤撫育籌
燈紡績教子慈不廢嚴次學修名列郡庠孫曾繞
膝卒年七十四歲

胡能人妻熊氏年二十六夫故二子俱幼艱難撫孤
現年七十二歲

尤世傑妻劉氏年二十八夫故家貧誓志孝養翁姑

現年六十二歲

李大解妻張氏年二十二夫故遺一子撫孤守節現年五十三歲

祝光詠妻李氏年二十七夫故生二子長五歲次三歲家貧如洗長子早亡氏勤於女紅上奉老姑下撫幼子辛勤百端志不少挫現年五十二歲

吳秀含妻傅氏年二十八夫故三子俱幼食貧撫孤現年五十歲

胡素安妻李氏年二十四夫故守節撫孤現年五十歲

沅江縣志

卷二十六 節孝

三十七

邊天成妻陳氏年二十八夫故一子尚幼誓志苦守見孫二曾孫十卒年八十歲

李永仁妻黃氏年十九于歸二十三夫故一子大指尚幼撫孤守節卒年八十歲後大指亦故媳陳氏年二十五生二子氏痛家世衰微姑老子幼茹苦含辛一門雙節現年六十三歲

王大才妻湯氏年二十七夫故一子尚幼釋甘貧矢志卒年五十八歲

陳肇瑞妻黃氏年二十七夫故子幼餓居食貧教子以義現年六十四歲

李大維妻楊氏年十九夫故一子尚在襁褓上事翁姑下撫孤子卒年五十歲

王顯邦妻秦氏年十八于歸二十六夫故一子方三歲氏矢志撫孤清操自勵卒年五十一歲

彭元生妻梁氏年十七于歸二十夫故無子撫姪周承祧食貧礪節白首辛勤現年八十二歲

曾嗣堯妻王氏年二十三夫故生子僅數月食貧撫孤現年七十五歲

李爲崑妻何氏年十六于歸二十四夫亡撫二子貧苦自甘現年五十五歲

沅江縣志

卷二十六 節婦

三十八

張之相妻王氏年十九夫歿生子甫八月艱難撫孤現年五十歲

李言範妻陳氏年十九于歸二十四夫故遺腹生一子氏矢志冰霜現年五十歲

傅楊氏傅立誠妻年十七于歸性賢淑念夫體羸多病二十後無子勸夫娶妾李年幼無知氏多方提攜調護得生一子名班九未逾月夫故氏終日偕李氏抱孤泣血未幾夫兄夫嫂亦相繼亡翁附貢生琮年老目盲行止不能自如氏朝夕奉養承顏喻志翁九十乃終喪葬盡哀盡禮族黨相稱無間

節與孝皆可風焉現年五十三歲

高邊氏高明亮妻年二十六夫故一子甫二歲家貧勵節勤紡績力操作以供衣食存年五十三歲

夏昭發妻楊氏年二十九夫故生四子氏矢志守節膏燈課子長朝棟邑庠生現年五十歲

沈有美妻吳氏二十八夫故遺子二女三家貧茹蘗飲冰事翁姑極孝姑逝事繼姑如前訓子勤勞饒有敬姜之風里黨咸稱苦節賢母現年六十六歲王大經妻高氏年二十八夫故守節遺子二長子本興次子本隆年二十身故次媳徐氏繼姑志遺一

子成祁娶妻汪氏逾數載身故汪氏亦念祖姑與姑相繼矢志誓不改節至今一門稱三節焉

蔡氏陳昌麒之妻益邑蔡荆山之女年十七于歸十八歲夫歿氏甘貧守志之死靡他撫夫兄歲貢生昌麟之次子家敏爲嗣事翁姑孝養無違待嗣子恩愛有加井臼親操布衣粗食終身自若苦節四十餘年現年六十歲

祝氏邑庠生陳朝雋之妻歲貢生祝鳳管之女性貞靜嫻內則夫歿氏年二十六哀毀盡禮矢志守節事舅姑極孝待幼子以慈親操井臼不辭勞瘁雖

屢經風折而古柏之操益厲現年六十歲

石宗貽之妻楊氏生於乾隆癸未年十八于歸二十四夫故子忠衛甫一歲抱孤泣血矢志靡他不幸丁卯歲忠衛又亡遺媳楊氏年二十孫孝鯉方二歲次孫孝鯤遺腹生氏偕媳甘貧自守言不出梱上事老姑生養死葬禮無稍失下撫幼孫伶仃孤苦相依爲命現年四十有八

陳南山之妻劉氏年二十一于歸廿三夫故遺一子任道甫週歲甘貧矢志事翁姑孝敬唯謹翁病典衣買藥姑歿鬻奩營棺延師教子不染市習家窘

沅江縣志

卷二十六 節婦

四十

莫支鬱悶成疾拒子延醫不肯示人以手卒年五十六歲苦節三十三載學師朱贈以匾聯

邑庠生王之紱妻馬氏年十八適王二十八夫故遺一子錫評甫週歲誓志撫孤支持門戶計守節五十四年現年八十五歲孫五曾孫五

續增

徐之鏞妻陸氏陸翊霄之女善化副榜陸懷信之胞姑母氏夫族自蘇來沅百餘載年十九歸徐孝事翁姑喪葬盡禮念九夫故矢志靡他遺一子文溶甫三齡義方教子苦守成立晚景歡娛弄孫自樂

守節四十二載卒年七十一歲

張日輝妻鄒氏國學生天命之女年二十六歲夫故一子隆典纔數齡氏撫孤守節矢志靡他孝事繼姑存沒盡禮先是氏夫兄弟六人相繼殂謝僅存五弟國學生日燦妯娌霜居清操共勵足不踰閭禮法自循及子弱冠娶芷泉吳太史之孫女郡增生良甸之女爲媳年十六于歸甫二十隆典又故遺一子校書方週姑媳朝夕號哭瀕危者再妯娌咸勸之曰汝幸有孫可延一綫倘傷生呱呱者誰靠耶氏乃輟泣並慰媳媳亦恪遵姑訓栢舟自誓

沅江縣志

卷二十六 節婦

又四十

相依爲命晝同室夜共寢操持家務丕振門閭克勤克儉縞素自如越今孫已成立延師教讀慈不廢嚴喜施與扶危濟困不稍吝惜同里瓦石磯渡舟子唯利是驚氏商媳吳氏捐腴田十八畝爲義渡以資舟子工食自是往來稱便合境賴焉邑人吳俊卿有義渡記氏守節三十年現年五十六歲胡曰敏妻宋氏年二十九夫故遺子二承三承緒家貧矢志冰霜自凜紡績維勤至今頭顱矍鑠長子承三補郡庠 學憲劉 賜匾額曰清節長齡現年七十二歲計守節四十三年

貞婦

國朝

賀佳妻陳氏陳克俊之女少許字賀經世四子佳幼過門未婚配年十四佳貿易桑植久客不歸後聞遇教匪身亡氏遣人覓數載無踪決志從一誓不他適撫姪承桃淒涼四十六載毫無遺玷現年六十歲

沅江縣志

卷二十六

貞婦

四十二

烈婦

國朝

曹家政妻吳氏吳啓秘之女二十八夫故遺二子尚在襁褓家僅窪田數畝氏茹苦矢志晝夜紡績時翁姑早逝事繼祖姑曲盡孝道乾隆戊□□酉連年水災日惟饘粥泊壬子癸丑繼祖姑又歿家益窮夫之伯叔憐其貧困促令招夫氏執不從赴池水死時年三十五歲族人憐之捐田數畝以爲祭祀貞烈之風至今令人生感焉

沅江縣志

卷二十六

烈婦

又四十二

亡僅生一女一子零丁孤苦氏年十五歸元常未幾元常染癆疾醫藥百易勢難痊可人咸危之但不令氏聞迨元常病篤彌留時對氏泣曰我不起汝青年曷能守氏忍聲答曰夫保重毋爲我慮奉持維謹度夫萬不能起又恐夫疑有異志先期潛入後園投古井以死明志次日元常卒年十八氏年十七慷慨激烈之概雖偉丈夫不能也族長擇胞伯廩生鄧鱗之孫元睿之子亨楷承祧一時多詩歌傳贊以表揚之

羅啓祥年十九娶李氏亦年十九啓祥好讀書銳意

進取因連次應試不利遂賫志而亡時李氏歸羅甫月餘皆諷以青春新婦必難自守氏屢聞人言心愈憂憤卽自經死遺言願夫婦同穴人咸嘆息

孝婦

國朝

張陳氏張德錦妻自幼過門翁早逝奉孀姑趙氏極孝年四十夫故遺三子氏仰事俯育拮据萬狀姑病垂危醫藥罔效氏日夜涕泣勢不能以身代因聞古人有割股救親事遂潛至後園焚香告天引刀割左手股肉一塊當暈倒隨甦恐股肉味澁乃和雞子煮之令其軟滑奉以進姑食之逾時病輒愈問何藥神妙至此氏不忍言姑後知之相抱痛哭遐邇皆驚嘆至今刀痕宛然康強無恙得見孫枝現年六十一歲

沅江縣志

卷二十六

孝婦

四十四

賢婦

國朝

李皮氏 欽賜國子監學正李光照之妻年十七孀於李門性淑慎善事翁姑和諧妯娌并日紡績內助攸宜尤念翁老姑更齒落氏細心奉膳每日另設小竈烹調糜滑堅味喜食者搗碎如意勤同口哺又家不甚豐快心分潤貧窶而針黹補綴雖雇工牧童亦無不一一留心孝敬仁慈遐邇稱誦舉子六皆名列膠庠有登賢書者孫曾繞膝壽七十而終

沅江縣志

卷二十六

賢婦

四十五

夏楊氏職員夏光先之妻孝子楊胆之女年十六于歸越三日其翁太學生夏昭義故明年姑亦逝氏傷餘奉日少哀痛迫切靈前供奉三年如一日夫就外傅氏持家事日操井臼夜勤紡績家頗豐衣粗食淡晏如也生子不育年三十僅一女氏念夏氏單傳身後事大力勸夫娶妾張氏生子大用撫育如己出其先張氏之歸夏也亦數載不娠光先急於嗣息又私買一妾慮氏不樂寄居外戚氏聞之卽遣人迎歸妻妾數人雍曉一室絕無詬誶里有妻妾不和者氏常迎至其家多方勸慰生平好

施與以故光先養孤老培荒墳發絮衣施棺木造
渡船建大埧港西頭橋修景星寺準提閣氏皆勸
助之卒年四十餘歲

壽婦

國朝

王姚氏邑庠生王臯妻生明崇禎六年身歷

國朝三世全盛卒雍正二年壽九十二子五兩歲貢三邑庠孫十六四邑庠一歲貢曾孫六長邑庠氏皆及見人稱全福

湯張氏湯斯美妻生康熙七年戊申二十九夫歿家赤貧撫四子艱苦撐持不易其志居家勤儉令諸子各務本業由是家貲漸豐長孫尚志登吏選曾孫禮銘列鬢序眼觀四代卒乾隆乙酉壽九十六歲

沅江縣志

卷二十六

壽婦

四十七

皮熊氏邑庠生皮正妻生康熙四十年辛巳子七人長宗傅次大勇邑庠生四宗倬歲貢生孫二十九六孫致元考授從九品職十九孫元敏二十一孫元趾皆邑庠生曾孫五十二元孫十眼觀五代人稱全福卒於乾隆五十九年甲寅壽九十四歲益陽知縣劉爾芊贈有壽文

余陳氏故儒士余元臣妻生康熙四十二年六月初四年十六歸余四旬夫故祖姑舅姑在堂家產無多氏竭力奉養喪葬皆如禮生子六耕讀悉遵母

訓季子信芳名列膠庠一門友愛緣中年矢志於
旌表之例不符然節因孝著德以福隆嘉慶七年壽滿
百歲紳士公呈舉報由學移縣待請

旌表氏閱世既久五代一堂孫十五曾孫三十一元孫
七合計子婦孫婦曾孫婦及各孫女等共百數十
口誠屬貞闡希聞允爲

昇平人瑞嘉慶十年二月二十八日卒壽一百零三歲
教諭駱孔僎有詩

劉王氏邑庠生劉宗唐妻生康熙四十九年壬辰秉
性柔順孝事翁姑年未四十宗唐故氏禮法自持

沅江縣志

卷二十六

壽婦

四十八

居家勤儉督課諸子不稍寬假季子大鰲名列膠
序孫十曾孫七元孫二五世同堂現年九十六歲
秦宋氏秦玉鐸妻年二十八夫遠出一子甫週歲訛
傳夫死於北道氏携胞弟往尋遺骸中途生遇歸
夫婦偕老氏享年九十四歲

聶張氏聶學淵妻生康熙五十三年歿嘉慶十一年
壽九十二歲

羅王氏羅霖鐸妻享年九十三歲詳節孝

陳高氏陳懋妻享年九十二歲詳節孝

羅張氏羅公拔妻生康熙五十六年丁酉十九歸羅

生子五長文藻邑庠生孫十一曾孫六壽九十一
歲學諭駱孔僎贈匾曰蕙堂介福

李郭氏李本魁妻現年九十二歲詳節孝

艾秦氏艾成章妻現年九十二歲詳節孝

王馬氏復姓王孫馬之書之妻監生王光燦庠生光
予之母生康熙五十六年己亥德性和順闡範嚴
肅夫早故教誨二子皆令成器至今孫曾林立四
世一堂現年九十一歲

楊熊氏楊嶺妻子二長青書授從九職孫曾林立壽
九十一歲

沅江縣志

卷二十六

壽婦

四十九

王江氏王文炳妻壽八十八歲

高李氏高立綱妻生康熙四十三年甲申卒乾隆五
十四年己酉壽八十八歲詳節孝

劉李氏劉錫侯妻現年八十八歲詳節孝

李袁氏李世宗妻邑庠生李善作之祖母生康熙戊
戌十八于歸李素貧氏竭力操作善事祖翁姑及
孀姑生子五長成譜尤敦孝友持家有法同堂五
十餘人氏及長子內外調持整齊嚴肅人稱義門
氏眼觀四代卒嘉慶甲子壽八十七歲

胡姚氏胡學孔妻現年八十八歲詳節孝

石彭氏石如珂妻生康熙六十一年十八于歸生子六少子尚瑛太學生如珂先卒氏事姑盡孝治家有法好施與宗族親戚時爲周濟年七十時目廢歷十年復能視物行走不用杖人以爲陰德之報迄今四代一堂同爨男婦七十餘人凜遵母訓肅雍和睦咸稱孝義之門現年八十九歲

金郭氏金文輝妻國學生金煜對曾祖母生康熙辛卯年性情賢淑生子五孫十五曾孫二十六卒嘉慶丙辰年壽八十六歲

祝石氏庠生祝成嵩妻生康熙壬子年子六孫十八
沅江縣志 卷二十六 壽婦 五十
卒乾隆丁丑年壽八十六歲

祝高氏祝如璞妻生康熙壬寅年夫故遺一子鳳毯國學生孫二曾孫三現年八十六歲

祝李氏祝如鑫妻生康熙癸巳年子五孫十六曾孫十三長子鳳書歲貢生 欽賜翰林院檢討卒于嘉慶丁巳年壽八十五歲

王陳氏王瑗臣妻生康熙十九年庚申歿乾隆二十九年甲申壽八十四子五長睦邑庠生孫十六十二孫大徽邑增生曾孫十六

高王氏高立階妻生康熙四十四年乙酉卒乾隆五

十二年丁未壽八十三歲子三長學正邑庠生次
學選郡增生

吳何氏吳自學妻生雍正六年戊申性貞惠善事翁
姑生子四長大進邑增生次大典國學生三大楷
四琳邑庠生四代孫曾一堂聚順現年八十二歲
國學生鄒天命妻王氏生子四長心璵郡廩生次心
瓊從九職三心琢四敬藻俱監生氏好善樂施捐
齊湖口義渡田十八畝壽八十二歲

吳劉氏吳映朝妻國學生吳瀚之母生雍正壬子年
好施與齊湖口捐修義渡氏慨出百金孫三曾孫

沅江縣志

卷二十六 壽婦

五十一

二現年七十七歲

王鄒氏生雍正三年乙巳歿嘉慶十年乙丑壽八十
一子四長本饒郡廩生孫入長成瑀邑庠生曾孫
一

蕭傅氏蕭承璞妻生雍正八年庚戌德性賢淑夫與
子歿後支持家務產業日增字寡媳秦氏倍極恩
愛孫澤翼入太學現年八十歲訓導劉文煥贈額
曰蘭庭煥彩

王熊氏郎保王榮妻壽九十六歲

詳節孝

張陳氏張聖文妻生康熙五十五年丙申卒嘉慶十

二年丁卯子三孫九長觀政邑庠生眼觀四代年九十二歲

李柴氏李芬生妻生雍正元年癸卯子八孫二十一曾孫五四代一堂夫芬生卒年八十五歲長子發揚現年七十一歲氏現年八十七歲教諭駱孔僕贈額曰慈筠晚翠

郭易氏郭太文妻年三十二夫故孀居治家有法眼觀四代現年九十歲

劉袁氏劉國貞妻壽九十三歲其子克仁妻胡氏生雍正八年庚戌克仁子四次必榮早喪遺媳黃氏年二十七孀居事奉維謹胡氏孫行林立現年八十歲

沅江縣志

卷二十六

壽婦

五十二

歐陽士賢妻傅氏卒年九十一歲子六長正學邑庠生五正元邑增生孫十九曾孫十六元孫八

庠生熊桂次子文鯉之妻皮氏職員皮文玉之女素性貞靜雍正三年夫早逝撫三子事翁姑極孝勤紡績好施與冢子繼辛讀書未就奉公惟謹現已循例舉報約正氏卒年八十五

明睿補邑廩生孫曾林立現年七十五歲

陳儲鈞與妻王氏俱生雍正十二年甲寅夫婦同庚
白首齊眉子六孫十二現年七十七歲

邑增生曹廷遂妻陳氏生康熙五十九年己亥生子
五孫十八曾孫三性柔順淑慎勤儉課兒曹以孝
友勗孫枝以詩書濟人之急扶人之危健步善飯
至今紡績不倦長男紹管郡庠生三男紹箕郡庠
生四男紹第郡庠生氏現年九十二歲

鄒其崑之妻王氏年三十一夫故遺子心鑑甫歲餘
氏撫育成立就四選孫八曾孫吏現年七十六歲

沅江縣志

卷二十六 壽婦

五十三

楊宗弔之妻劉氏生雍正八年庚戌子二孫七曾孫
一現年八十歲